

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DATO' HAJI MOHD ZAIM BIN ABU HASAN

TARIKH : 28.11.2017

SOALAN : NO. 27

Dato' Haji Mohd Zaim Bin Abu Hasan [Parit] minta MENTERI PENDIDIKAN TINGGI menyatakan status terkini Program CEO@Faculty dan sejauh manakah penglibatan pihak industri memberi impak kepada pelajar termasuk pelancaran Airasia@UPM.

JAWAPAN

Tuan Yang di-Pertua,

Untuk makluman Ahli Yang Berhormat, Program Fakulti Ketua Pegawai Eksekutif atau lebih dikenali sebagai *CEO Faculty Programme* yang diperkenalkan oleh Kementerian Pendidikan Tinggi (KPT) bertujuan untuk memberikan pendedahan kepada pelajar melalui perkongsian pengalaman dan kemahiran oleh pelbagai tokoh Syarikat Berkaitan Kerajaan (GLC), industri terkemuka dan pegawai-pegawai tinggi Perkhidmatan Awam.

Sejak mula diperkenalkan, sebanyak 200 sesi perkongsian syarahan yang berjumlah 1,500 jam telah diadakan, melibatkan sekitar 90,000 pelajar dan warga akademik di institusi pendidikan tinggi (IPT). Antara tokoh yang terlibat adalah Tan Sri Dr. Ali Hamsa, Ketua Setiausaha Negara; Tan Sri Abdul Wahid Omar, Pengurus Permodalan Nasional Berhad; Tengku Dato' Sri Zafrul Aziz, CEO CIMB Malaysia dan Dato' Sri Syed Zainal Abidin, Naib Presiden PETRONAS. Sesi perkongsian ini

telah mewujudkan integrasi dan sinergi antara tenaga pakar industri dengan penyelidik universiti serta secara tidak langsung menghasilkan ekosistem inovasi yang saling berkaitan antara akademia, industri, kerajaan dan komuniti.

Kesinambungan daripada kejayaan *CEO Faculty Programme*, KPT telah melancarkan *CEO Faculty Programme Version 2.0 “Coached by the Pros”*. Program ini bertujuan menyediakan pemimpin yang akan menerajui pengurusan tertinggi universiti pada masa hadapan. Program ini disertai oleh 53 pensyarah muda universiti awam berumur antara 30 hingga 40 tahun yang berkelulusan doktor falsafah sebagai *CFP Fellows*. Melalui penempatan 6 bulan *CFP Fellows* di 26 buah syarikat CEO, *CFP Fellows* memperoleh pengalaman dan pengetahuan secara bimbingan peribadi daripada CEO dan berpeluang mendalaminya kemahiran rundingan, kemahiran rangkaian perhubungan dan kemahiran kepemimpinan daripada CEO.

Untuk makluman Ahli Yang Berhormat, KPT melalui Universiti Putra Malaysia (UPM) telah menjalankan kerjasama strategik bersama AirAsia Berhad dengan penghasilan *livery* iaitu logo UPM pada sebuah pesawat AirAsia. *Livery* ini merupakan hasil rekaan daripada Fakulti Rekabentuk dan Senibina UPM. Kerjasama antara UPM dan AirAsia ini adalah bukti kejayaan program *CEO@Faculty* yang dilaksanakan dengan pembabitan Tan Sri Tony Fernandes, CEO Air Asia yang berkongsi pengalaman dan kejayaannya dengan pelajar dan kakitangan UPM sejak 2 tahun lepas.

SOALAN (28)**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN

TARIKH : 28 NOVEMBER 2017
[SELASA]

DARIPADA : YB YB TUAN HAJI WAN HASSAN BIN MOHD
RAMLI [DUNGUN]

SOALAN :

YB TUAN HAJI WAN HASSAN BIN MOHD RAMLI [DUNGUN] minta
PERDANA MENTERI menyatakan mengapa pendaratan minyak dan
gas masih dikekalkan di Songkla Thailand dan berapakah hasil royalti
yang dibayar kepada pihak berkuasa Thailand sejak beroperasi
sehingga 30 September 2017 dan bilakah tamat tempoh perjanjian.

JAWAPAN :-

Tuan Yang di-Pertua,

Untuk makluman Ahli Yang Berhormat, pendaratan minyak dan gas dari lapangan minyak dan gas di bawah *Malaysia-Thailand Joint Authority* – (MTJA) masih dikekalkan di Songkla, Thailand memandangkan ianya adalah lebih ekonomik untuk menggunakan kemudahan tersebut. Langkah ini juga adalah selaras dengan persetujuan bersama di bawah inisiatif MTJA sebelum ini, di mana ibu pejabat MTJA dibuka di Kuala Lumpur dan pendaratan minyak dan gas di bawah MTJA akan mendarat menggunakan kemudahan yang dibangunkan di Songkla, Thailand.

Sekian, terima kasih.

28 November 2017